

超〕附船回宁波。

廿一日。金元直名星桂，浙江翰林，周瀛士之女婿也、徐雨之、黄覲臣、朱叔彝名其懿，湖南候补府、方子听、何天爵、鼎德牛庄领事。语次，始知其曾至伦敦相见，托带各国条约赴京、禧在明、美查次第来见。亦出门两次，回金元直拜。疲于奔命。晚邀刘融斋、叶顾之、徐雨之、姚伯容、郑陶斋、黄覲臣、马少梁小酌，即少梁所馈菜也。融斋、顾之、少梁皆不至。何天爵以二事相邀，以前任伯理玺天德来游中国，宜示优待也。一请太后接见其夫人，一请沈幼丹制军来上海迎迓其伯理玺天德。吾皆却之，而谓制军多病，又须入都，届时或能启节，便道上海一接，亦所应为，或前后时不相值，则亦恐长江数百千里之隔，有不暇至也；至太后接见各国王后，历无此典礼，其势万不能行。而何天爵之意，尚欲以为请，外人之固执如此。

廿二日。礼拜。为西洋一大节气，所谓耶苏复生日也。相沿以廿日为西历礼拜第五日，耶苏以是日被刑死，逾三日复生。但以四月中礼拜日为衡，日期先后勿论。刘芝田、莫善徵、丁韞石、方子听四君过谈，遂尽一日之力。韞石为何小宋、李玉阶、丁禹生三公会扎赴闽办理洋务，暮年颠沛，不能自存，为之浩叹。有致何小宋一函，即交韞石带呈。子瀚及易卓超自宁波回。昨夜十二点钟闻轰烈之声甚巨，遣人出探，还言浦东泊舟失火。早乃知失火者乃浦东煤厂，非泊舟也。

廿三日。叶顾之、陶从仪名在铭，江苏试用县、陈智琳名元会，江苏候补同知，办理北广局、姚日新名启铭，介福庄总办次第来谈。姚伯容、黄覲臣、蒋珩卿皆各馈菜，因邀周瀛士，姚彦嘉、彦森，张听帆晚酌，而自赴美领事贝礼之召，同席刘芝田、何天爵、马高文及管带水师官五人，其统领名喀尔登，官视中国参将。是日震通总理